

Inuusuttut nunanut allanut ilinniariarsimasut inuiaqatigiinnut ilisimasaminnik piginnaasaminnillu ilapittuutaajartorlutik angerlaqqinnissaminnut piumassuseqarnerulernissaat anguniarlugu uagut Inatsisartuni ilaasortat qanoq iliorluta inuusuttut nunaminnut sakkortuumik attuumassuteqartutut misigisimalersissinnaanerigut pillugu apeqquteqaat allaavigalugu oqallinnissamik siunnersuut.

(Inatsisartuni ilaasortaq Steen Lyngge, Demokraatit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Naalakkersuisut Inatsisartuni ilaasortap Steen Lyngep, Demokraatit, apeqquteqaat aallaavigalugu oqallinnissamat siunnersuutaanut qujarusupput.

Inuusuttut sivisunerusumik ilinniagaqarniarlutik nunanut allanukartartut piginnaasamikkut nukittuujupput, nunatta ineriartortinnissaani pingaaruteqalersinnaasut. Taamaattumik taakkua tassaapput puigugassarinnngisavut, naak piffissami sivisoorsuarmi ungasissorsuarmiittaraluartut.

Nunatsinnut attuumassuteqarnek pineqaraangat inuk tamarmiusoq nunami allami ilinniagaqartoq isigissavarput. Pissutsit assiinnngitsut attuumassuteqarnermut sunniuteqarput, taakkununga ilanngullugit inuuniarnikkut pissutsit, ilaqquttat, kulturi aamma suliffittaarnissamat periarfissat. Taamaasilluni suliaasaq inuiaqatigiit tamarmiullutik kivitseqataaffigissavaat.

Kalaallit illuutaanni Danmarkimiittuni ilinniartut attuumassuteqarnerisa ataannartinneqarnissaat annertuumik iliuseqarfigineqarpoq. Kalaallit illuisa ilinniartitaanermut tunngatillugu suliaasaat Illut aamma Namminersorlutik Oqartussat tamanna pillugu isumaqatigiissuteqarnikkut nalimmassarneqarnikuuvoq. Illut ilaatigut Danmarkimi nunanilu allani ilinniarnermik aallartitsinermut tunngasunik assigiinnngitsunik kalaallinik ilinniartunik siunnersuinissaq siunertaraat. Ilinniartunut kalaallit illuini arlalinnik aqqissuussisoqartarpoq, inunnet akuunermut tunngasut aamma teknikimut tunngasut, ilinniartunik ilinniartuunersiuteqarnek pillugu malittarisassanik paasisimasaqalersitsissusat. Aammattaaq atuarnep aallartinnerani paasisitsiniaalluni siunnersuisoqartarpoq kiisalu ilinniarnep naammassereernerata kingorna Kalaallit Nunatsinni suliffeqalernissamat periarfissanik paasisitsiniaasoqartarluni. Taakkua saniatigut kalaallit illui najukkami kalaallinut Kalaallit Nunaannullu soqutiginnittunut sunngiffimmi sammisaqarnermi attaveqarfittut katersuuffittullu atorneqartarput. Aammattaaq kalaallit illui kalaallinut Danmarkimi najugaqartunut katersuuffittut atorneqartarput, soorlu assersuutigalugu AVALAK, Danmarkimi ilinniagaqartut peqatigiiffiat. Ataatsimut isigalugu oqartoqarsinnaavoq, kalaallit illuutaat toqqaannngitsumik nunagisamat attuumassuteqarnermik misiginissamat siuarsaataasartut.

Ilinniartuunersiuteqarnermut malittarisassat aamma attuumassuteqarnermik misiginermut nukittorsaataasussanik arlalinnik imaqarput. Ilaatigut ukiumoortumik akiliunneqarluni angalanermik akiliussisoqartarpoq. Ilinniartunut meeqqanut akisussaasuusunut Kalaallit Nunaannilu najugaqartunut juullimut atuangiffeqarnermut atatillugu angalanermi akiliunneqarnissaq periarfissaavoq. Aamma nunatsinni sulinermit atatillugu sungiusarnissamut angalanermi akiliunneqarnissaq neqeroorutigineqartarpoq. Aammattaaq ilinniagaqarnermi aningaasanik taarsigassarsiniarnissaq pitsaasoq periarfissaavoq kiisalu angerlarnermi ilinniarnermut atatillugu taarsigassarsiarisimasanik utertitsinissamut tapiinissamut periarfissaqarluni.

Aaqqissuussinerit allat taaneqarsinnaasut tassaapput suliffeqarfiit ukiumoortumik suliffimminnik Danmarkimi ilinniartunut nittarsaassisarnerat, tassani suliffeqarfimmi sulisut naapinneqarsinnaapput nunatsinnilu suliffittaarnissamut periarfissat eqqartorneqarlutik.

Nunani allani ilinniartut ilinniarnertik ingerlallualeraangat atuakkallu tungaasigut ilisimasaqalerlutillu piginnaasaqaleraangamik Kalaallit Nunaanni sulinissaminnut annertusiartuaartumik pilerigineqalersarput. Taamaattumik nunatsinniinneranni atuangiffeqarnerup nalaani ilinniartutut sulinissaannut kajumissaartariaqarpagut. Atuarnermut atatillugu ilinniakkamut attuumassuteqartut, taamaasillutik suliffeqarnermut attuumassuteqartutut misiginerat sakkortusiniassammat. Taamatuttaaq atuarnermut atatillugu suliassat imaluunniit immikkut ittumik allaaserisat Kalaallit Nunaanni ajornartorsiutinut tunngassuteqarsinnaapput aammalu kiffartuussivimmumut imaluunniit suliffeqarfimmut nunatsinniittumut suleqatigiinnikkut suliarineqarsinnaallutik, tamatumalu suliffeqarnermut attuumassuteqarneq nukittorsassavaa.

Taamatut oqaaseqarlunga Naalakkersuisunit inersuarmi maani oqallinnissamut qilanaarnerat oqaatigissavara.